

“TENEMOS GANA CASAMOS”

MOZA.- ¡Madre, qu’ alegría tan grande!
Mira, Xuan, quien ta pequí.
¡Cuántu tiempu yá ensin velu!
¿Qué mos cunta usté, Lluisín?

LUIS.- Qué razón tenéis rapazos,
muncho va que nun mos vemos.
¡Ai, fiyinos! Salgo poco,
yá nun pueo colos güesos.

MOZU.- Home, Lluís, nun desaxere,
que ta fechu un bon chaval.
Yá me quixera yo ver
como ta usté a la so edá..

LUIS.- Si nun fora esti carbón
que tengo metíu equí,
y nun me dexa soplar,
yá veríeis lo que val Luis.

MOZA.- Ande, ande, que val muncho,
que yá lo sabe tol pueblu
que si s’alcuentra usté mal
ye porque fue un bon mineru.

LUIS.- El testeru ye perduru.
Por gustu naide lu quier.
Pero’l platu hai que llenalu
a la hora de comer.

MOZU.- Que ye negra yá se sabe,
y que ye dura tamién.

Pero si nun ye'l carbón,
¿d' Asturias qué diba ser?

MOZA.- Ye verdá. Mire, Lluisín.
Nun sabe lo que daríen
por un puestu nel testeru
de Llaviana a Carbayín.

LUIS.- ¡Ai, rapaza! ¿Tu qué dices?
Naide mira pal mineru.
¿Cómo van querer metese
estos rapacinos nuevos?

MOZU.- ¿Non mos acaba dicir
Qu'usté metióse na mina
pa poder llenar el platu
a la hora la comida?
Pos por eso mesmo agora
queremos dir pa la mina.

MOZA.- Voi a dici-y una cosa,
Y nun empiece usté a guasase:
Estos dos qu'usté ve equí
tienen gana de casase.

LUIS.- Norabona entós, fiyinos.
Nun sabéis cuánto m'allegro.
Conocéisvos de neñinos,
y en casa tarán contentos.

MOZU.- Pero pa poder casamos
nun val solo con quere-se.
Hai que ganar un xornal,
y nun hai onde metese.

LUIS.- Pos a la mina, fiyín,
 Qu’ aunque seya negra y dura
 cuando mos fai bona falta
 nun hai que tener nin dulda.

MOZA.- ¡Ai, Lluís! Usté nun sabe.
 Pa poder na mina entrar
 hai que tener bon enchufe,
 y si non, nada de nada.

MOZU.- Asina como usté lo oye.
 Ensin él nun hai puestín.
 Y como yo nun lu tengo
 equí sigo solterín.

LUIS.- Si, home, si, claro que sé
 qu’ agora pa picar carbón
 úsase como un aparatu
 con corriente d’ un cordón.
 Pero hai otros trabayos
 que nun tendrás qu’ enchufar,
 como tirar de la pala,
 o la madera postiar.

MOZA.- ¡Ai, Guasús! Nun mos entiende.
 D’ esi enchufe nun falamos.
 Hai que tener... amigos,
 cuasi, cuasi, diputaos.
 Porque piden tantos puntos
 que nun hai forma alcanzar,
 y yá me toi viendo yo
 vistiendo santos n’ altar.

LUIS.- ¿Qu’hai que tener munchos puntos?
 Ellí nun se fai calceta.
 Ellí hai que ser bien plantáu
 y sudar la camiseta.

MOZA.- Nun son puntos de texer.
 Son coses de burocracia.
 Son coses que nun entiende
 más que’l que fai la cuayada.

LUIS.- Cuasi m’afuego de risa
 con eso que tas diciendo.
 ¡Cuando’l mineru yera
 como’l cuchu poco menos!

MOZU.- Yá ve como son les coses.
 Y pa la pena afogar
 vámosmos de romería
 a echar una baillotiada.

MOZA.- Tien de cuidar esi afuegu,
 que’l sudor qu’ellí dexó
 tien de disfrutalu agora
 que pa daqué trabayó.

LUIS.- Bono, fíos, divertivos,
 y a buscar un diputáu,
 que ye una pena que teais
 solteros y non casaos.

TELÓN